

## ДАВЛАТНИНГ ТАШҚИ ХАВФСИЗЛИГИНИ ТАЪМИНЛАШДА АМИР ТЕМУР ТОМОНИДАН ҚҮЛЛАНИЛГАН РАЗВЕДКА ЖАНГОVAR ҲАРАКАТЛАР

**Шаимов Одил Косимович**

Ўзбекистон Республикаси Қуролли Кучлари Академияси катта  
ўқитувчиси

**Аннотация:** Мазкур мақолада Амир Темур давлатида ташқи хавфсизлигини таъминлашда разведка органлари, маълумотларни йиғиши, таҳлил қилиш, хуносалар чиқарилиши ва керакли қарорлар қабул қилиниши, шунингдек, махфий йиғилишлар, маълумотларни сирсақлаш ҳамда душман томонни баҳолашдаги кўрсаткичлар ҳақида фикр юритилади.

**Калит сўзлар:** Амир Темур, давлат хавфсизлиги, хавф-хатар, таҳди, разведка органлари, қўшин, ҳарбий-сиёсий вазият, енгил отлиқ аскарлардан ташкил топган бўлинмалар, савдо-сотик баҳонасида пинхона иш олиб борувчи савдо карвонлари (савдогарлар), элчилар, дарвишлар (қаландарлар), саёҳатчилар, Амир Темур томонидан маҳсус тайинланган амалдорлар.

Соҳибқирон Амир Темурнинг жаҳоншумул обрў-эътибор ва шоншуҳрат қозонишида бош омил ҳисобланган жиҳат, яъни саркардалик даҳоси, ҳарбий истеъоди ва маҳорати, жаҳон ҳарбий соҳасига қўшган улкан улуши борасида кўпдан-кўп фикр-мулоҳазалар, илмий ҳамда бадиий асарлар мавжуд. Лекин, Амир Темур томонидан мамлакат мустақиллиги ва унинг ҳудудий яхлитигини таъминлашда ташқи хавфларни олдини олиш, уни ўз вақтида бартараф қилишга катта эътибор қаратишини эътироф этиш жоиздир. Бу борада Амир Темур “Темур тузуклар”да қуйидаги фикрни баён этади. “Амир қилдимки, мингта тезюරар түя минган, мингта от минган елиб-югурувчи кишини чопқинчи, минг нафар тезюරар пиёдани чопар этиб тайинласинларки, турли мамлакатлар, сарҳадларнинг хабарларини, қўшни ҳукмдорларнинг мақсадлари ва ниятларини билиб, ҳузуримга келиб, воқеа, кор-хол юз бермасидан бурун унинг чораси ва иложи қидирилсин” [1], - деб таъкидлайди.

Тарихга назар солар эканмиз, бунда турли даврларда “Жангнома” ва “Жаҳонгирнома” каби асарлар силсиласи

яратилганки, уларда миллий қаҳрамонлар ва саркардалярнинг жасорати, жанг театри майдонида яккама-якка урушгани, совук қуроллардан фойдаланиш, жангчининг ҳимоя кийимлари, жанг майдонида жангчиларни ҳаракати, ўқотар қуролларни тайёрлаш каби ҳарбий мавзуларга доир тарихий маълумотлар келтирилган [2].



## **Ташқи хавфсизлигини таъминлашда қўлланилган разведка восьиталари.**

Мамлакатда хавфсизликни таъминлаш, хавф-хатарни олдини олиш, таҳдидларни бартараф этиш, мамлакатнинг ҳудудий яхлитлигини ва мустақиллигини таъминлаш, бошқа давлатларга тобе, яъни таъсир доирасига тушиб қолмаслик мақсад қилиб олинади.

Мамлакатни ташқи душман кучларидан ҳимоя қилиш, хавф-хатар ва таҳдидларни олдини олиш, давлат хавфсизлигини таъминлаш учун биринчи навбатда етарли душман ҳақида маълумотга эга бўлиш кераклиги, зарурати пайдо бўлди. Шу билан бирга қўшинни душманга нисбатан тўғри йўналтира олиш, ташаббусни қўлга киритиш, ҳужум қилаётган душманни қисқа муддатда янчиб ташлаш учун ўз вақтида керакли ва зарурий маълумотга эга бўлиш кераклигини Амир Темур яхши тушунганди.

Амир Темур ўзининг тузугида “Амр қилдимки, - деб ёзади, - ҳар ерда, вилояту шаҳар ва лашкар ўрдусида кундалик воқеаларни ёзувчиларни тайин қиласинларки, ҳокимлар, раият, сипоҳ, ўз лашкари ва ёт лашкарнинг хатти-ҳаракати ҳақида мени хабардор қиласин. Атрофдан кирган-чиққан мол-мулк, четдан кирган, четга чиққан ёт кишилар, ҳар турли мамлакатлардан келган карвонлар, қўшни подшоҳлар, уларнинг гап-сўзлари, ишлари ҳақидаги хабарлар ва узоқ ўлкалардан бўлиб, менинг даргоҳимга юзланган уламо, фузало ҳақидаги сўзларни тўғрилик билан ёзиб турсинлар” [3]. Амир Темур давлат хавфсизлигини таъминлашда маълумот алмашинуви тизимили равишда тартибга келтириб, маълумотни олиш ва уни ўз вақтида керакли обьектга узатишни ҳамда маълумотнинг мазмун-моҳиятига нисбатан қўшин жанговар шай ҳолатда бўлиши катта аҳамият касб этган.

Ташқи хавфсизликни таъминлашда разведка органлари (айғоқчилар)дан фойдаланилган. Ташқи хавфсизликни таъминлаш асосан айғоқчилик хизматига асосланган бўлиб, барча айғоқчилар дунёнинг турли мамлакатларида қўйидаги қўринишлар (буғунги кунда – разведка органлари)да фаолият юритган:

- 1) Енгил отлиқ аскарлардан ташкил топган бўлинмалар;
- 2) Савдо-сотик баҳонасида пинхона иш олиб борувчи савдо карвонлари (савдогарлар);
- 3) Элчилар;

4) Дарвишлар (қаландарлар),

5) Саёҳатчилар;

6) Амир Төмур томонидан маҳсус тайинланган амалдорлар;

Бу разведка органлари ёрдамида маълумотлар базаси, яъни **“Ягона ахборот майдони”** (буғунги кунда долзарб)ни яратди. Бу разведка органларини Амир Төмур шахсан ўзи амалиётга жорий этиб, доимий равишда фаолиятини кузатиб борди.

Амир Төмур ташкил этган бу разведка органларини тарихчиларнинг қуийидаги манбаларига таянган ҳолда кўриб чиқамиз:

Рус генерали Михаил Игнатьевич Иванин ўзининг “Икки буюк саркарда: Чингизхон ва Амир Төмур ҳарбий санъати, стратегияси ва тактикаси” деб номланган асарида **“Амир Төмурнинг бошқа давлатлар ҳақидаги маълумот тўплаш учун қўллаган воситалари”** ҳақида қуийидаги маълумотларни келтиради.

**1) Енгил отлиқ аскарлардан ташкил топган бўлинмалар** – чегарадош давлатлар тўғрисидаги керакли маълумотларни Амир Төмур минг кишилик енгил бўлинмалари воситасида тўплар эди. Бу бўлинмалар сувсиз чўл ерларида түя миниб, бошқа жойлардан эса отлиқ ва пиёда ҳолда ҳаракат қиласардилар. Қўшни чегарадош давлатлар ҳақида маълумот тўплаш ниятида улар, албатта, ҳийланайрангларни ишлатишар, қўшни давлатлар кимга ва қачон уруш бошлаш ниятлари борлигига, шу давлат ҳокимларининг мақсадларини билиб олишга ҳаракат қиласардилар эди [4]. Мазкур бўлинмалар келтирган маълумотларга қараб, Амир Төмур тегишлиchora-tadbirlar kўrardи”.

Бундан ташқари Төмур тузукларида “Амр қилдимки, минга тезюар түя минган, минга от минган елиб-югурувчи кишини чопқинчи, минг нафар тезар тиёдан чопар этиб тайинласинларки, турли мамлакатлар, сарҳадларнинг хабарларини, қўшни ҳукмдорларнинг мақсадлари ва ниятларини билиб, ҳузуримга келиб, хабар қилсинлар, тики бирон воқеа, кор-хол юз бермасидан бурун унинг чораси ва иложи қидирилсин”, - деб таъкидлайди.

**2) Савдо-сотик баҳонасида пинхона иш олиб борувчи савдо карвонлари (савдогарлар)** – маълумотларга эга бўлишнинг яна бир йўли савдо муносабатлари баҳонасида ҳам тўпланиши мумкин эди. “Амир Төмур савдо карвонларини Осиёнинг турли ўлкаларига, Хитой, Ҳиндистон, Миср, Саудия Арабистони, Сурғия, Гуржистон (Грузия) ва

ҳатто Европа давлатларига ҳам юборар эди. Карвон қайтиб келганидан кейин дарвиш қўринишида савдогарлар билан карвонга қўшилган аъёнлар йўл давомида кўрган давлатларидағи шартшароит, шу давлатда яшовчи халқ урф-одатлари, энг асосийси, ўша давлат ҳукмдорларининг ўз фуқароларига бўлган муносабатлари ҳақида маълумот берардилар".

Амир Темур саёҳатчи, савдогар ва карвонбошиларга ҳомийлик қилган. Улардан лозим бўлган маълумотларни олиш учун маҳсус ишончли амалдорлар, маълумотларни йиғувчи (разведка бошлиғи) тайин қилиниб, улар орқали мол айирбошлаш, чет эллик саёҳатчи ва олимларнинг асл ниятлари ҳақида аниқ маълумотларни тўплашлари, айғоқчилар ёрдамида ўзга давлатлар ҳукмдорларининг Амир Темурга бўлган муносабатларини ўрганишлари, бу маълумотларни тез ва аниқ қилиб унга етказишлари лозим бўлган.

**3) Элчилар** – М.Иванин ўз асарида кейинги восита сифатида элчилар ҳақида қўйидагиларни ифодалайди. "Агар бу маълумотлар ҳам етарли бўлмаса, **элчилар** юборар, улар эса, ўз навбатида, унга керакли бўлган маълумотларни етказишлари шарт эди" [5].

**4) Дарвиш (қаландар)лар** – Амир Темур бирон бир давлат тўғрисида қўшимча маълумотларга эга бўлиш учун дарвишлардан ҳам фойдаланган. Дарвишларнинг ҳаракатлари ташқи қўринишига нисбатан ниқобланганлиги ва ҳеч ким шубҳа остига олмаслигини инобатта олинса хавфсизроқ бўлган.

**5) Саёҳатчилар** – Амир Темур разведкани олиб боришнинг яна бир қўриниши сифатида саётчилардан ҳам фойдаланган. Уларни молиявий томондан қўллаб-қувватлаб, савдогарларнинг карвонига қўшиб юборган. Савдогарлар олиб келган маълумотларга аниқлик киритиш, уларнинг маълумоти қанчалик тўғри ёки нотўғри эканлиги ва маълумот оловчи сифатида чекловларнинг деярли йўқлигини инобатта олиш ва маълумотларнинг аниқрок келтирилишига хизмат қилган.

**6) Маҳсус тайинланган амалдор** – Амир Темур ўз салтанатида контр разведкани бошқа мамлакатлардан келган сайёҳлардан маҳсус тайинланган амалдорлар ёрдамида сұхбат қуриш, савдо йўли билан ва мөҳмон қилиш орқали маълумот алмашувини амалга оширган [6].

Амир Темур айғоқчиларни лавозимига қараб олтин, кумуш ва мисдан тайёрланган пайза (гувоҳнома)лар билан таъминлаган. Бу

пайза (гувоҳнома) орқали маълумот ташувчининг шахси ва кимга тегишилиги ҳамда маълумотнинг ишончлилиги аниқланган.

Ибн Арабшоҳ Амир Темурнинг давлат хавфсизлигини таъминлаш бўйича қилган ишлари ҳақида қимматли маълумотлар қолдирган.

Натижада, у (жосус)лар чор-атрофда бўлаётган ҳодисалар ва уларнинг хабарларини Темурга етказиб, ўзлари афзал кўрган ишларини унга баён этардилар. Улар вазнлари, нарху наволари тўғрисида унга зикр қилиб, манзилу шаҳарларни тавсифлардилар. Уларнинг текис ва нотекис жойларининг суратини келтириб, уйлари ва диёрлари ўринларини чизиб кўрсатардилар, шулар орасида у жойларнинг яқин ёки узоқ, тор ёки кенглигини, уларнинг қайси теварак-атрофда, ғарб ёки шарқдами (эканлигини), шаҳарлар ва қишлоқларнинг исмларини, манзил ва паноҳжойлар номларини, ҳар бир жойнинг аҳлию бошлиқлари, амирлари, улуғлари, фозиллари, шарифлари, бойларию фақирларини, уларнинг ҳар бирининг исми ва лақабини, шуҳрати ва насабини, уларнинг ҳунари ва (эга бўлган) воситаларини (тўла-тўкис) баён қилардилар. Натижада, Темур ўз фикри билан шу (нарса)ларни яққол кўриб, тафаккури воситасида ўз ерларидан хориж жойлар устидан ҳам тасарруф юритарди. Мабодо у бирор шаҳарда қўниб, шу шаҳар аъёнларидан бири билан суҳбатлашса, у дарҳол фалону фулон тўғрисида, фалон киши билан фалон вақти содир бўлган ҳодисанинг қай тарзда бўлганини ва ўша воқеанинг нимага бориб тақалғанлигини, фалон билан фулон ўртасида низо тушганда, улар қандай иш тутганлигини суриштира бошларди. Шунда ўша суҳбатдошининг назарини шу воқеалар юз берган пайтда Темур ҳозир (бўлган) экан-да, деган фикр қамраб оларди. Кўпинча Темур ўз суҳбатдошига чалкаш масалаларни ташлар, (уларга) ораларида бўлиб ўтган мунозаралару мукотабалар тафсилотини (ўз аслидай) ҳикоя қиларди. Улар гўё Темур ўша бўлиб ўтган воқеалардан олдиндан воқиф ёки бўлмаса, бу хабарларнинг ҳаммасини ўз олимлари орқали билади, деб тасаввур қилардилар. Шу сабабли ҳам баъзи кишилар Темурни Соларияда истиқомат қилган деб ўйласа, баъзи лоғчилар ҳатто уни Шамийсоия фақирлари орасида кўрганлигини ҳикоя қилардилар.

#### **ФОЙДАЛАНИЛГАН МАНБАЛАР:**

1. [1] [3] [13]. Темур тузуклари. – Тошкент: “Ўзбекистон”, 2019. Б. 139, 59, 59, 149.
2. [2]. Самаров, Р.С. Миллий ҳарбий мерос - жаҳон ҳарбий санъати тизимида: концептуал ёндашув / Р.С. Самаров, Ўзбекистон Республикаси Қуролли Кучлари Академияси Ҳарбий таълим ва фанда инновациялар . – 2021. № 2(11). – 6 б.
3. [4] [5] [6]. Михаил И.И. Икки буюк саркарда Чингизхон ва Амир Темур ҳарбий санъати, стратегияси ва тактикаси. – Тошкент: Янги аср авлоди, 2017. – Б. 224, 225, 229,
4. [7]. Ибн Арабшоҳ. Амир Темур тарихи. – Тошкент: Мөҳнат, 1992. – 71-72 б.
5. [8] Марсель Б. Менким, Соҳибқирон – Жаҳонгир Темур. / Б. Марсель – Тошкент: Янги аср авлоди. 2018. – Б. 263, 264, 265.
6. [9] [10] [11]. Низомиддин Шомий. Зафарнома. – Тошкент: Ўзбекистон, 1996. Б. 103, 104, 130, 157, 160, 161.
7. [12] [14]. Шарафуддин Али Йаздий. Зафарнома. – Тошкент: “Шарқ”, 1997. Б. 130, 134, 135.